

新元史

第四二册

列傳第五十八

新元史卷之一百六十一

賜進士出身日講起居注官翰林院侍讀國史館纂修膠州柯劭忞撰

昂吉兒

哈刺解

忽刺出

葉諦彌實

塔里赤

沙全

謁只里

囊家歹

昂吉兒西夏人姓野蒲氏世爲西夏將家太祖十六年
父甘卜率所部來降隸蒙古軍籍仍以甘卜爲千戶病
卒昂吉兒領其父軍從征諸國有功至元六年授千戶
佩金符略地淮南所向無前時塞馬畏暑往往病疥癘

昂吉兒率所部馬入山療之病良已由是軍中馬病者
率以屬昂吉兒歲療馬以萬數宋輸糧金剛臺將深入
昂吉兒將兵斷其輸道因上言河南邊郡與宋對境宋
兵時爲邊患唐州東南皆大山非兵路信陽州南直九
里武陽平靖五水等關宋兵從諸關入信陽實其咽喉
往年金亡朝廷得壽泗襄郢而不留兵以守卒使宋得
之請城信陽以扼宋勅昂吉兒率河西軍一千三百人
城之九年加明威將軍信陽軍萬戶佩虎符分阿朮所
將河西兵與之加懷遠大將軍丞相伯顏渡江留阿朮
定淮南東道其西道則屬之昂吉兒駐兵和州宋淮西

制置使夏貴遣侯都統將兵四萬來攻有謀內應者悉誅之潛兵出千秋澗塞其歸路敗之獲人馬千計遂攻廬州夏貴使人來言曰公毋攻吾臨安降吾卽降矣宋亡貴舉所部納款昂吉兒入廬州民安堵無所犯遷鎮國上將軍淮西宣慰使宋丞相文天祥起兵舒州入張德興應之陷興國德安諸郡還據司空山詔昂吉兒攻之一戰而定殺張德興執其三子以獻江左初平官制草創權臣阿合馬納賂鬻官僚冗濫一州佩金符者多至三四人由行省官薦授宣慰使者甚眾昂吉兒入朝具爲帝言之帝驚曰有是哉因謂姚樞等曰此卿輩

所知而不爲朕言昂吉兒顧言之邪卽命偕平章哈伯
左丞崔斌翰林承旨和魯火孫符寶奉御董文忠滅汰
之仍通諭江淮軍民時兩淮荆榛蔽野昂吉兒請立屯
田以給軍餉帝從之旣而阿塔海言屯田所用人牛農
具甚衆今有事日本若復調發民兵恐不勝其擾議遂
寢未幾宣慰使燕公枏復以爲言帝乃遣數千人卽芍
陂洪澤試之果如昂吉兒所言乃以二萬兵屯田歲得
米數十萬斛加輔國上將軍河南行省參知政事淮西
宣慰使都元帥進驃騎衛上將軍行中書省左丞加龍
虎衛上將軍行尙書省右丞兩官皆兼淮西使帥帝命

阿塔海等領兵十萬征日本昂吉兒上疏其略曰臣聞兵以氣爲王而上下同欲者勝比者連事外夷三軍屢劬不足以言氣海內騷然一遇調發上下愁怨非所謂同欲也請罷兵息民不從旣而師果無功拜行省平章政事昂吉兒官淮西幾二十年專悞自恣宋亡宿盜出沒淮海昂吉兒庇之受其賂遺按察使姚天福劾之昂吉兒遣小校丁文虎刺天福於中途不及事具天福傳詔遣近侍阿朮侍御史萬僧訊其事昂吉兒坐免官元貞元年昂吉兒又以擅殺訟天福於京師事寢不報未幾卒子五人其顯者曰昂阿朮初爲速古兒赤從征乃

顏有功襲廬州蒙古漢軍萬戶府達魯花赤大德初從討宋隆濟嘗出私財築室百二十楹居軍士時論稱之曰暗普海北海南道肅政廉訪使孫教化的世襲千戶史臣曰世祖伐日本將相大臣不敢沮其事獨昂吉兒抗疏爭之謂兵以氣爲主而上下同欲者勝可謂善料勝負者其人雖暴恣其言曷可廢歟

哈刺解哈魯氏父八合從睿宗伐金大戰三峯山射中金恆山公武仙睿宗見而奇之賜名奧樂拔都時大雪軍士饑寒瀕死八合殺所乘馬食之多所全活後從破汝州卒贈懷遠大將軍沿海翼管軍萬戶輕車都尉汝

南郡侯哈刺斛少英邁負奇略初從大軍圍襄樊與宋人相距六年哈刺斛卧不脫甲冑由是知名十二年從丞相伯顏伐宋授管軍百戶十月大軍次揚州宋將孫虎臣遣使告曰古者鬪將不鬪兵今遣劉都統挑戰請擇武勇善鬪者當之勿妄殺士卒伯顏召諸將問之皆相顧莫敢應哈刺斛請行伯顏拊其背曰壯士也適兩將所乘馬皆黑陣於揚子橋力戰數十合未決勝負劉都統稍刺哈刺斛墜地劉馬逸哈刺斛上馬追之劉回稍出其左腋下哈刺斛挾稍斬其首以歸觀者數萬人謹譟動地劉號黑馬劉宋驍將也是日伯顏以帳前儀

衛送哈刺斛還營繪戰圖以進賞甲冑銀鞘刀又從丞相阿朮與宋人戰於焦山獲海船二艘阿朮使招討王世強造白鷁海船百艘就四十一萬戶翼摘漢軍三千五百人新附軍一千五百人命哈刺斛與世強統之攻拔宋江陰許浦金山上海崇明金浦等縣獲海船三百餘艘遂戍澈浦海口十三年春行省檄充沿海招討副使宋將張世傑舟師至慶元胸山東門哈刺斛追之獲戰船四艘移戍定海港口秋宋昌國州胸山秀山舟師千餘艘攻定海哈刺斛迎擊禽其裨將并獲大艦三艘宋兵復來攻哈刺斛敗之行省檄充蒙古漢軍招討使

十月哈刺斛引兵出温州青嶼招降宋温州守將家之炳十一月至福州獲宋海船二十艘禽其將毛監丞等十四年賜金符宣武將軍沿海招討使行省檄充沿海經略副使與萬戶劉深行元帥府事於慶元復檄充沿海經略使兼左副都元帥督造海船八月江西行省左丞塔出等攻廣南命哈刺斛率所部從之進昭勇大將軍沿海招討使佩金虎符時宋兵陷温州哈刺斛復取之進拔朝陽縣宋將陳懿等以畚兵七千人降塔出攻廣州不利哈刺斛引兵會之諭宋安撫使張鎮孫侍郎譚應斗以城降又與宣撫梁雄飛招討王天祿追張世

傑於香山獲其將李茂等詰之茂供世傑與陳宜中攻泉州眾尙數千船八百艘比至虎頭山遇風船壞眾皆溺死宜中僅以身免哈刺解復追世傑於七洲洋獲宋主昞之母舅俞如靖諭宋南恩州守將梁國傑以畚軍萬五千人降十五年還軍慶元條上防海便宜自南恩州至上海設水站三十有一置巡兵警邏七月入朝賜金織文衣鞍勒進昭武大將軍沿海左副都元帥慶元路總管府達魯花赤十六年日本商船至慶元港口哈刺解諜知無他意言於行省與貿易而遣之又禽海賊賀文達等獲船六十餘艘十八年進輔國上將軍都元

帥從大兵征日本遇颶風乃還復命哈刺斛鎮慶元二十一年罷都元帥更立沿海上萬戶府以哈刺斛爲達魯花赤二十二年入朝賜名哈刺斛拔都奏請賜兵士衣裝及禁戢私鹽數事世祖嘉納之賜錦衣玉帶金鞍勒弓矢有差二十四年加鎮國上將軍浙東道宣慰使仍兼管萬戶府二十五年樞密以水軍無元帥奏哈刺斛兼之明年拜金吾衛上將軍中書左丞行浙東道宣慰使領軍職如故大德五年入朝進資德大夫雲南行省右丞偕劉深征八百媳婦大軍失利深坐誅哈刺斛亦免官十一年以疾卒於汝州哈刺斛在浙東有惠政

及卒浙東民多立廟祀之皇慶二年贈榮祿大夫中書平章政事鞏國公諡武惠子哈刺不花襲沿海萬戶府達魯花赤卒子安坦襲

忽刺出蒙古氏曾祖阿察兒事太祖爲博兒赤祖赤脫兒從太宗征欽察康里等部有功爲涿州達魯花赤卒伯父哈蘭朮襲職佩金符以功稍遷益都路蒙古萬戶歿于軍忽刺出襲哈蘭朮職初授昭勇大將軍至元十二年攻宋六安軍行省命領諸軍戰艦遇宋軍敗之大軍次安慶忽刺出及參政董文炳爲前鋒與宋孫虎臣等戰于丁家洲大敗之戰于朱金沙又敗之七月及宋

人戰于焦山時丞相阿朮督戰忽刺出與董文炳冒矢
石沿流鏖戰八十里身被數創不肯卻宋張殿帥攻呂
城又與萬戶懷都生獲之十三年大軍至臨安丞相伯
顏命忽刺出守浙江亭及北門時揚州猶爲宋守忽刺
出敗揚州軍于揚子橋又敗真州軍追李庭芝至通州
海口江南平加昭毅大將軍尋遷湖州路達魯花赤十
四年進鎮國上將軍淮東宣慰使戍上都改嘉議大夫
行臺御史中丞進資善大夫福建行省左丞遷江淮行
省除右丞拜光祿大夫江浙行省平章政事以疾卒
葉諦彌實朵魯伯斛氏宿衛世祖潛邸世祖常陰視衛

士腰帶見葉諦彌實獨精好命佩刀侍左右從敗宋兵於金剛臺又從戰於簪箕窩中流矢墜馬易騎復戰大敗之遣子紐鄰請城光州召面陳得失賜金鞍一授昭勇大將軍光州等處招討使從伯顏伐宋總十二萬戶攻陽邏堡分鎮黃州徙潯陽以扼江西下南康瑞昌德安分攻洪州章江門不克諭以禍福其守將卽開門降遂下撫州建昌撫賊張青阻險自保夜趨七十里襲其柵獲青爲賊脅從者悉縱之樂安崇仁宜黃等縣俱納款與諸帥分道取閩所嚮克捷會黃州復叛帥府以葉諦彌實有威名召還使總江西兵討平之民爲立生祠

初湖廣兵屯樊口葉諦彌實言形勢不利其將鄭鼎不聽果敗死葉諦彌實得鼎虎符奏聞遷鎮國上將軍廣東道宣慰使拜江西行省參知政事爲同官誣搆左遷招討使入覲自明改江西道宣慰使以直前枉拜福建行省參知政事又改江西平邵武等處土賊世祖欲立行樞密院徵行省官一人入議葉諦彌實奏對稱旨授僉書江西等處行院事至元二十四年卒年七十子伯帖木兒千戶紐鄰襲萬戶野仙帖木兒同知咸平府事保保同知江陰州事

塔里赤康里人父也里里白太祖時授帳前總校塔里

赤幼穎異好讀書尤善騎射襲父職行省奏充斷事官
時南北民戶主客良賤雜糅蒙古軍牧馬草地互相占
據命塔里赤勘定軍民各得其所從大軍克樊城襄陽
又從丞相伯顏渡江駐臨安尋命平章奧魯赤等分爲
六路追襲宋廣益二王塔里赤領軍至福建所過秋毫
無犯宋都統陳宗榮率眾來降以功遷福建招討使時
諸郡盜起陳吊眼擁眾五萬陷漳州行省承制命塔里
赤爲閩廣大都督征南都元帥總四省軍復漳州生擒
陳吊眼戮于市復從征叛蠻敗黃聖許等積功加鎮國
上將軍三珠虎符廣西兩江道宣慰使都元帥賀州盜